



Análise FGE

A Lei Europea do Clima

O Parlamento Europeo e o Consello da UE logran a finais de abril un acordo provisional sobre a Lei do Clima Europea.

Esta lei, enmarcada no Pacto Verde Europeo, converte en vinculante o compromiso da UE de alcanzar a neutralidade climática de aquí a 2050 e todas as políticas da UE e dos Estados membros terán que ser coherentes con este obxectivo.

A Comisión creará un sistema de seguimento dos avances relacionados con esta lei e un mecanismo de axuste para adoptar novas medidas en caso necesario.

Data de publicación: maio de 2021

Contacto: bruselas@fundaciongaliciaeuropa.eu

1. Introdución

O Parlamento Europeo e o Consello da UE veñen de chegar a acordo sobre a nova Lei do Clima Europea, unha das iniciativas más salientables do [**Pacto Verde Europeo**](#), a nova estratexia de crecemento da UE.

Mediante esta lei, os compromisos políticos da UE en materia de clima convértense nunha obriga xurídica, sendo vinculantes:

- **O compromiso da UE de acadar a neutralidade climática en 2050.**
- **O obxectivo intermedio de reducir as emisións netas de gases de efecto invernadoiro para 2030 en polo menos un 55 %, con respecto aos niveis de 1990.** Este obxectivo foi adaptado coa revisión en setembro de 2020 da proposta de regulamento. Con anterioridade, o obxectivo da UE para 2030 era acadar unha redución do 40% das emisións.

Para lograr estes obxectivos será preciso que a UE no seu conxunto e os Estados membros de maneira individual adopten as medidas necesarias para acadar **cero emisións netas - as emisións unha vez deducidas as absorcións - de gases de efecto invernadoiro**.

Así mesmo, a lei climática fomentará que haxa **coherencia entre todas as políticas da Unión e o obxectivo de neutralidade climática**, así como a colaboración de todos os sectores económicos para redactar follas de ruta sectoriais específicas, en liña coa visión holística ofrecida polo Pacto Verde Europeo.

2. Características

Ademais dos dous obxectivos xa citados, introdúcense os seguintes elementos:

- A máis tardar en xuño de 2021, a Comisión Europea revisará ou proporá **revisar todos os instrumentos pertinentes** para cumplir coas reducións adicionais de emisións para o ano 2030:
 - Directiva relativa ó réxime de comercio de dereitos de emisión (ETS, polas súas siglas en inglés)
 - Regulamento de reparto do esforzo, que introduciu obxectivos nacionais de redución das emisións de gases de efecto invernadoiro para 2030. Fai

referencia á maioría de sectores non incluídos no ETS, como os transportes, os edificios, a agricultura e os residuos.

- Regulamento que esixe aos Estados membros lograr un equilibrio entre as emisións e as absorcións de gases de efecto invernadoiro resultantes do uso da terra, o cambio do uso da terra e a silvicultura (LULUCF, polas súas siglas en inglés)
- **Un procedemento para establecer o obxectivo climático para 2040.** A Comisión Europea propón a adopción dunha **traxectoria de 2030-2050** a escala da UE para reducir as emisións de gases de efecto invernadoiro, medir os progresos e ofrecer máis previsión ás autoridades públicas, as empresas e aos cidadáns.
- **Un compromiso a favor de emisións negativas a partir de 2050.** As emisións negativas (ou “eliminación de CO₂”) refírense á retirada de gases de efecto invernadoiro da atmosfera e ao seu almacenamento en chans, subsolos e océanos. Isto pódese facer mediante diferentes procesos, xa sexan tecnolóxicos ou naturais, como é o caso de bosques e terras, que actúan como “sumidoiros de carbono”.
- A creación dun consello asesor científico europeo sobre cambio climático, do que formarán parte 15 expertos dos 27 Estados membros da UE. En virtude dos seus traballos, a Comisión Europea estará facultada para emitir recomendacións aos Estados membros cuxas actuacións non sexan coerentes co obxectivo de neutralidade climática, e os Estados membros estarán obrigados a seguiras ou a xustificar o motivo de non facelo.
- Disposicións más estritas en materia de **adaptación ao cambio climático**. Esixirse aos Estados que formulen e apliquen estratexias de adaptación para reforzar a resiliencia e reducir a vulnerabilidade contra os efectos do cambio climático.
- **Medidas para facer un seguimento dos avances e axustar as accións en consecuencia**, sobre a base dos sistemas existentes, tales como o proceso de gobernanza para os plans nacionais dos Estados membros en materia de enerxía e clima, os informes periódicos da Axencia Europea de Medio Ambiente e os últimos datos científicos sobre o cambio climático e as súas repercusións.
- **Avaliación da Comisión Europea da coherencia das medidas nacionais e da UE co obxectivo de neutralidade climática e a traxectoria de 2030-2050.** Isto levarase a cabo non máis tarde de setembro de 2023, e posteriormente cada cinco anos.

3. Contexto

Nas súas [**Conclusións de 12 de decembro de 2019**](#), o Consello Europeo aprobou o obxectivo de lograr unha UE climaticamente neutra de aquí a 2050, en consonancia cos obxectivos do Acordo de París. Recoñeceu que era preciso instaurar un marco facilitador e que a transición esixirá importantes investimentos públicos e privados. Co [**acordo sobre o orzamento comunitario**](#) 21-27 e o instrumento temporal de recuperación Next Generation EU, **polo menos un 30% do gasto total debe destinarse a proxectos relacionados co clima.**

dunha Lei do Clima Europea, que forma parte dun paquete máis amplio de medidas anunciadas na Comunicación sobre o Pacto Verde Europeo, mediante a que se establece unha nova estratexia de crecemento destinada a acadar, mediante unha transición xusta, unha economía con cero emisións, eficiente en recursos e competitiva, que converta así a Europa no primeiro continente climaticamente neutro de aquí ó ano 2050.

Segundo a proposta inicial, a Comisión Europea presentaría en setembro de 2020 unha avaliación de impacto coa finalidade de incrementar o obxectivo de redución das emisións de gases de efecto invernadoiro da UE para 2030 ao 50% como mínimo e cara o 55%, con respecto aos niveis de 1990, e proporía modificar a proposta en consonancia. Esta avaliación sinalou que a redución nun 55% no só era beneficiosa para acadar a neutralidade climática, senón viable, polo que o novo obxectivo foi incluído na proposta revisada de Regulamento da Lei do Clima Europea.

4. Próximos pasos

O acordo político acadado está aínda suxeito á aprobación definitiva do Consello e do Parlamento Europeo, o que se prevé que ocorra antes de que finalice en xuño a Presidencia portuguesa. O Regulamento da Lei do Clima Europea será publicado no Diario Oficial da Unión Europea, entrando posteriormente en vigor.

Ademais, a máis tardar o 30 de xuño de 2021, a Comisión Europea avaliará como deberá ser modificada a lexislación da UE pola que se aplica o obxectivo para 2030 para que se poida lograr unha redución das emisións do 50% ao 55% en comparación con 1990 e acadar o obxectivo de neutralidade climática en 2050.

Máis información

- [Proposta de Regulamento](#) polo que se establece un marco para acadar a neutralidade climática e se modifica o Regulamento 2018/1999 (Lei do Clima Europea)
- [Proposta modificada](#) do 17.09.2020 relativa ao Regulamento da Lei do Clima Europea
- [Páxina web](#) da Lei do Clima Europea